



Samráðsgátt stjórnvalda

21. júní 2021

Efni: Umsögn um drög að breytingarreglugerð vegna 1. breytingar á reglugerð nr. 1065/2014, um velferð nautgripa, auk breytinga á viðauka I og II við hana.

Landssamband kúabænda (LK) þakkar fyrir tækifæri til að veita umsögn um framlagðar breytingar á reglugerð um velferð nautgripa. Samtökin taka þó fram að í kynningartexta í samráðsgátt sem fylgdi með umræddum drögum eru boðaðar frekari breytingar á reglugerðinni sem þó er hvergi að finna í texta fyrirbyggjandi breytingarreglugerðar um velferð nautgripa svo séð verði. Hér er átt við ákvæði um básalengdir, fóðurganga og brynningu. Þá er einnig minnst á ákvæði um 10 % sveigjanleika frá stærðum til að hægt sé að aðlaga eldri fjós að reglugerðinni. Ekkert af þessu er að finna í fyrirbyggjandi breytingarreglugerð eins og áður segir og áskilja samtökin sér rétt til frekari athugasemda ef til þessara breytinga kemur.

Að öðru leiti fer hér umsögn Landssambands kúabænda:

Burðarstíur

LK tekur undir þá breytingu að fella brott þá skyldu að í fjósum sem byggð eru fyrir gildistöku reglugerðarinnar skuli vera burðarstía og mat Matvælastofnunar um að ekki sé þörf á að í slíkum fjósum sé burðarstía þar sem kýrnar beri á básunum.

Eldvarnir

Í 4. gr. er lagt til að við reglugerðina bætist ákvæði um eldvarnir. Að mati LK á slíkt ákvæði ekki heima í velferðarreglugerð nautgripa enda heyra eldvarnir undir byggingarreglugerð nr.112/2012 sem heyrir undir umhverfis- og auðlindaráðuneyti. Matvælastofnun (MAST) hefur eftirlit með framkvæmd reglugerðarinnar um velferð nautgripa og þetta ákvæði þýddi því í raun að MAST yrði að hafa eftirlit með fullnægjandi eldvörnum. Það fellur tæpast undir sérsvið MAST og því óljóst hvernig stofnunin á að geta sinnt þessu eftirliti. Leggja samtökin því til að þetta ákvæði fari út hér.

Útivist

Í 5. gr. a) lið er gert ráð fyrir því að allir nautgripir sem ekki eru fæddir á því árinu komist í hagabeit í að minnsta kosti 8 vikur á tímabilinu frá 15. maí til 15. október. Almennt er LK fylgjandi slíku fyrirkomulagi en aldur kálfanna er þó áhyggjuefni. Fyrstu 12 mánuðirnir eru þeir viðkvæmustu á vaxtarskeiði kálfa og ljóst er að kálfar sem að fæðast t.d. í nóvember og desember eru ansi ungir næsta sumar þó ekki séu þeir fæddir á því ári. Umfangsmikið tap á vexti, t.d. með brottfalli kjarnfóðurs, getur átt sér stað á þessu tímabili og því telja samtökin að heppilegra orðalag væri að um væri að ræða alla nautgripa sem náð hafa 12 mánaða aldri í stað orðanna „[u]ndanskildir eru kálfar fæddir á viðkomandi ári“. Þessi krafa myndi að



óbreyttu skaða hagsmuni stéttarinnar og er óljóst hvort þetta sé svo ungum gripum endilega fyrir bestu enda ungir gripir sérstaklega viðkvæmir fyrir mikilli bleytu og roki.

Í 5. gr. b) lið er gert ráð fyrir að útiskjól fyrir gripi hafi að minnsta kosti 3 veggi og þak. Þar sem þessi skýli væru oft á opnum svæðum þyrfti afar traustar undirstöður til að slík mannvirki fýkju ekki með tilheyrandi hættu fyrir menn og dýr. Slík mannvirki krefðust væntanlega leyfa frá byggingarfulltrúum sveitarfélaga. Slíkt myndi gera framkvæmdir fremur kostnaðarsamar. Gerir þyrfti ráðstafanir fyrir slíku í byggingarreglugerðum eða veita undanþágur í þessari reglugerð sérstaklega. Í það minnsta þarf að skoða þessar kvaðir nánar til að tryggja að það verði ekki of íþyngjandi fyrir bændur að koma sér upp slíkri aðstöðu. Þá er orðalag ákvæðisins með þeim hætti að mögulegt væri að túlka það sem svo að braggar sem víða eru notaðir í þessum tilgangi væru óheimilir. Ljóst er því að skýra þarf orðalag hér og huga að víðtækari áhrifum þessa ákvæðis.

Virðingarfyllst,

Margrét Gísladóttir

Margrét Gísladóttir

Framkvæmdastjóri Landssambands kúabænda